

**Ŋwàk nè Mantombi,
nè Pol à Còm Fa Bùu sè Mvwe'
Lak
TÈTÀLONIKÀ**

Lak Tètàlonikà à ye tu lak nè mvwe' nzenḡòn Màsìdoniyà nè. Pol à kè mùk cos fo' yi. Pol nè, nè ye Timatì bə Silàs wèḡ à vè fo' bəbɛ'. A ka sàp fana bùu Juus mok wèḡ yeto ḡḡòto liḡ Pol sə bup, bup. Wo à sə ḡù ve'nə bùusè wo à sə wa mùmchè'nè Pol à sə tsòho ncèp Jisòs nè fana bùu awo mok sə yèto ḡḡòbwi lòmok ma nè Pol nè. Yà' à ḡhak fana Pol me'rə lak Tètàlonikà sə. A sàp ko' fana Timatì com tsok vesə fa Pol nè mùmchè'nè cos nè mvwe' lak Tètàlonikà nè sə ḡi.

Pol à còm fa wo ḡwàk nè mantombi ènə ḡḡòtsè' Krətèḡ sə də wo ko ntəm, nè təḡḡ mali ḡḡḡḡ. Wo à sə fek kɛ'cà yà' mɛ cos anə bə mùmchè'nè də Jisòs nè bwi foho vəə. Wo à sə fek mok duk də, a ye-a ḡḡa ḡwè dzəm bohòJisòs, nè kɔḡ ḡḡa Jisòs nè ka ntòbwi və, fana Jisòs nè kə bwi vè ntsə'mòk, wo tse' yàwo lùḡ nè nà'a nè kà mè sè' àlɛ? Jisòs nè nè və yè'sə sèḡ nɛ? Pol à jə mvək ènə ḡḡòtsè' ḡesə fa wo də Jisòs nè bwi foho və. Yi vəə, yi jəḡ bùu sè wo à dzəm bohòyi nè kɔḡ lo laḡ kə sè wo cu mali ntòḡwəm àlɛ' pwe' ya bə yà'wèḡ lo nè kə cum mok mvèsè nè mvèsè. Yi tsok wo də yà'wèḡ sə fak mali meḡu ve'nə nè sə kontəm, də Jisòs nè nè vè tsə li ntsə'mòk.

¹ Còm ḡwàk nè'e mùu Pol, ves Silàs, nè ye

Timatì wèŋ bəbɛ'. Vès sə còm fa nà' bohòbùu cos nè mvwe' lak Tètàlonikà. Vès lɛŋ də Tà Nwì fa wɛŋ fifi, nə gu wɛŋ bəbɔŋ.

*Pol Kwa Bə Fantum
Nə Ye Ncù Krətɛŋ
Mvwe' Lak Tètàlonikà*

² Ghà nè vès lɛŋgə Nwì nè yi tè' avès pwe', vès sə tsərə wèŋ. Vès sə kwasə yi bùu tu awèŋ. ³ Búsə vès tsərəgə fàak sè wèŋ à gu bùusè wèŋ à fa ntum awèŋ bohòTà avès Jisòs Krɛst ŋgòfàk bohòyi. Vès sə tsərə mvəsə wèŋ à fàk gugɛŋ bùusè wèŋ dzəm yi, nə ye mvəsə wèŋ naaŋgə tu bohòyi bə ntum nè zìnə, nè co wèŋ nə kà maŋkwèŋ foho yà'a sè'.

⁴ Bwetè' avès, vès rɛŋtse' duk də Nwì dzəm wɛŋ, nə cokfis jə noŋsə wɛŋ də wèŋ bùu ye. ⁵ Vès rì vɛ'nə bùusè ghà nè vès à jə vè fa wɛŋ Ntirè nè Bəbɔŋ nè Jisòs Krɛst nə, nà' ànə ka bohòwèŋ co ncɛp sè wà və. Nà' ànə ye bə ŋàaŋ Yòŋsə nè Rərəŋ nə. Wèŋ à rì bəbɔŋ də Ntirè nè Bəbɔŋ nə ye zìnə. Wèŋ rì ncu avès nè bəbɔŋ nè vès à sə cu, ŋga vès cu vesùwèŋ sè'. Vès à cu vɛ'nə lòŋ ya yà'a bɔŋ ma njàwèŋ. ⁶ Wèŋ ànə cum fɹ'rə nsàp ncu avès, nə ye nè Tà nə. Wèŋ ànə ye na ŋgə' sè' wùriŋ fana wèŋ à jə ncɛp Nwì nə bə kwəkwa. Kwəkwa nə nà' à vè bohòYòŋsə nè Rərəŋ nə. ⁷ Yè'sə ànə ye vɛ'nə fana, wèŋ ye mok bùu sè ŋgònitsè' fa bwìŋ mandzè nè bùu sè wo à dzəm Jisòs pwe' tse' ŋgòye. Wèŋ à ye vɛ'nə bohòbùu sè mvwe' nzeŋgòŋ Màsìdoniyà, nə ye sè mvwe' nzeŋgòŋ Akayà. ⁸ Ncɛp nè bə liŋ Tà nè nà'à sə ye ndzə nì'i wèŋ nə à ka mvwe'

nzenḡòn Màsìdoniyà bə Akayà ləsə meḡu. Yu sə də, b̄u sè ma fòpwe' a yuk m̄m̄vè'nè wèn a fa nt̄um awèn bohòNwì. Yà' nə yeè nə vɛ'nə fana, yu s̄m̄ok sè vèes nə cɛp fe'lə bwì bə liḡ awèen b̄u. ⁹ Vès yuk də b̄u yà'a wèn sè cɛp m̄vè'nè vès ànə kə ke' ye wən, wèn ḡu ves bəbɔḡ yà'a. Wo cɛp m̄vəsə wèn a mè'rə r̄um sè wà, nə bwì lo ma nə Nwì, ḡòk̄ksə yi nə yi Nwì zinə nə, nə yi cu ḡwəm. ¹⁰ Nə ye sè' də wèn sə tək mo ye nə yi Jisòs, ḡòtsə vè m̄bu. Yi nə Nwì à lòkoksə yi m̄we' k̄p̄. A Jisòs nə yi a caḡsə ḡesə vesùwèn m̄we' dzè' nzak nə Nwì nə kə sak bwìḡ b̄u jèjòk ye.

2

Nsàp Nt̄um Nè Pol A Tse' ḡòTsòho Nza' Nwì

¹ Bwema avès, wèn r̄iḡtse' yàwèn sè' duk də m̄vè'nè vès a kə ke' yə wən yà'a, à ka wà ca. ² Wèn r̄i m̄vəsə wo ànə yak ves, nə yeḡsə ves ḡə' m̄we' lak Filipiyà ḡkuḡ vès sə coho və ḡòkə yə wən m̄we' lak Tètalonikà yà'a. Anə ye-a sè duk də bwìḡ ànə sə ḡu co də wo lok mandzè də ya bum kà fo' fàk fana, Nwì ànə ḡu ya w̄ə kà ves ko. Nwì ànə ḡu ves vɛ'nə fana, vès ko mali nt̄um ḡòtsə' fa wən Ntirə ye nə Bəbɔḡ nə.

³ Ncɛp àvès nə vès sə dzəm də nà'a ni sə nt̄u wèn nə, nà' ka bə tè'eḡkup yeḡ. Vès sə kà nà' wà tsòhòbasə. Nə ye sè' duk də vès sə kà mandzè də vèes borə ḡwə nəmòk b̄rə l̄p̄. ⁴ Yusə lɛ vɛ'nə duk də, vès cɛp m̄vəsə Nwì duk də vèes cɛp. Nwì nə a k̄k̄ ja'a ves, nə də vèes kək̄rə

co yi fa ncèp ye nə ndzə bohòvès. Fana mvè'nè vès sə cèp bohòwèŋ, vèes kà mandzè nè ɲògù də ya bwiŋ sə kwa bohòvès làpgè. Vèes làpgè yàvès mandzè nè ɲògù ya Nwì kwa yi. Yi Nwì nè yi riŋ yusè yà' cu sə vèə vès. ⁵ Wèŋ rì sè' vè'ε bəbɔŋ duk də, mvəsè vès à vè bohòwèŋ, vès à ka bə nsàp nè ɲòkwəsə bərə wəŋ bə ncèp cù nè bəbɔŋ wà və. Nwì rì də vès à cèp bum kà ɲòjə yumòok awèŋ, nə ghak bə zəŋ ye. ⁶ Vès ànə ka mandzè nè co wèŋ, kè bùu səmok sè zok, kwasə ves sè' lap. ⁷ Nə ye sè' də vès co ɲgàa ntum Jisòs Krəst, vès ànə fek-a wəŋ ɲòfa ves bum sè vès dzəm, yà' kà bə jòn sè' ye. Fana vès ànə sə ye megu yu avès fùə. Vès à ye fùə, co ɲwà nəmòk nə yi sə kək bwe ye wèŋ vè'ε. ⁸ Njə nè vès ànə dzəm wəŋ wùriŋ fana, ntum bəŋ ves ɲògàp Ntirè nè Bəbɔŋ nè nà' à vè bohòNwì nə vesùwèŋ. Vès à ye kəkurè ɲòkrə bùu wèŋ sè'. Vès dzəm wəŋ vè'ε cèbùə.

⁹ Bwema am, wèŋ rìŋtse' mvəsè vès à ci' ndùrù bə fàk vè'ε wùriŋ ghà nè vès à ye vesùwèŋ yà'a. Mvəsè vès à sə tsòho fa wəŋ ntirè nə, vès à fàk maràŋ bə ndzəmè də ya vèes kà də vèes kək lis bohòwèŋ bə yusè vès dzəm yà' duk. ¹⁰ Wèŋ, nə ye Nwì, rì sè' duk də ncu avès nè vès à cu vesùwèŋ, sè wèŋ Krətəŋ, nà' à ye rərəŋ nə ye rərəŋ sè'. Yumok sè co wo bəŋ ves də yà' à ye bə jòn à ka yeŋ. ¹¹ Wèŋ rì də vès à kotse' wəŋ lònŋ mvəsè tɛ'ε kotse'gè bwe ye. ¹² Vès à sə kwε'sə wəŋ, vès ce'e fa wəŋ ncèp sè ɲòfīsə wəŋ ntum də ya wèŋ cum nsàp ncu nè nà'a kəkurè bohòNwì. Bəsə yi Nwì nè yi à

co'fis wen̄ ɲgòkè tse' bo sənə gaŋ ye sè yà'a ve'ε maŋgəŋgèŋ sə.

Pol Kwa Bə Dzədzəm Nə Ye Kontum Bùu Tètàlonikà

¹³ Fana njo mòk cu malì nè vèes kwasəgè Nwì bùu zen̄ sè'. Yusə də mvəsè vès à jə vè fa wen̄ ncèp Nwì, wèn̄ yuk nà', nə jəŋ nà' co ncèp Nwì anə. Wèn̄ à ka nà' co ncèp ɲwə nè sə nze fɛɛŋ jəŋ. Nga nà'a ncèp Nwì anə nè zìnə. A sè' ncèp ènə nè nà' sə kùm ntəm awèn̄ sè wèn̄ a dzəm Jisòs. ¹⁴ Mù cèp ve'nə bùusè, yusə yà' a gù wen̄, yà'a mègù sè' yusə yà' a gù bùu coos Nwì sè mvwe' nzen̄gòŋ Jùdiyà, bwema avès a. Vès sə duk bòp bùu sè wo bùu Jisòs Krɛst yà'a. Wèn̄ a yə ɲgə' ndzə bohòbùu lak awèn̄ sè' mvə'nə wo à yə ɲgə' ndzə bohòbùu Jus sè wo bùu lak awo. ¹⁵ Bùu Jus yà'sə, a wo sè wo à zə Tà Jisòs, bə ɲgàa tsòhòbum Nwì, nə fa ves ɲgə'. Bùu yè'səə jòksəgè Nwì ntəm. Wo mègù co ɲgbə bə nàm bohòbwìŋ pwe'fo'. ¹⁶ Ghà nè vès à sə tsòho fa bù lakmvum ncèp nè co nà' fa wo lùŋ nə fana, wo lap mandzè co vès kà yà'wèn̄ tsòhòfa. Mvəsè wo à gù ve'nə yà'sə, ye də wo à gù wesə nsàap bup awo sè wo gùgè sə pwe' mok laŋ. Nə yeè nə də wo jòksə Nwì ntəm ɲgòsak wo laŋ.

Pol A Dzəm ɲgòKε' Yə Wo Səmok

¹⁷ ɲgòcèp yumok bə ma nè njàvès fana bwema avès wèn̄, yà'a kè bùuŋ təəŋ də vesùwèen̄ nə ga'a tsoŋ mənə mvək momjo. Gègà'à nə a mègù də vesùwèn̄ a ka lis mok sə yenə bwèrɛ wèn̄ a cu malì sə ntùè vès. Vès a lap mandzè ve'ε guŋaŋ

dük də vèes ye fe'lə weŋ səmok, būsè mvəsè vesùwèŋ à gà'a yà'sə, a yaan ves sə ntuu vɛ'ɛ wùriŋ. ¹⁸ Vès a dzəm də vèes bwi lo kə ye weŋ. Mù bə tu am, mù a ləp mandzè ngòbwi fe'lə lòkəkè' fana Satà sə lok ves mandzè. ¹⁹ Yumok ka bup, būsè a sè wèŋ à gù ŋkuŋ vès tse' naan tu nə ye kwəkwa, ni' sə boŋ ves də ghà nè Tà Jisòos vəə, vèes nə kə təəŋ mantombii yi co bũu sè wo ca caŋ nə caŋ ghak. ²⁰ Bə nè zìnə, vès sə kwa, ni' sə boŋ ves sè' bũu wèŋ.

3

Timati Kwe'sə Bũu Tètalonikà Wèŋ

¹ Mvək nè ngòko ntum à ka mok yeŋ fe'lə fana, vès mam yàvès lak Atèn fɛɛŋ vəvès, ² nə də Timatii lo kə ye weŋ. Yi moma àvès, nè venəwèŋ fàkgè bəbɛ'. Vès fàkgè bohòNwi ngòtsòho fa bwìŋ Ntirè nè Bəboŋ nè nà'a bə liŋ Jisòos Krɛst. Vès tumsə yi də yi kə kwe'sə weŋ nə gu weŋ ya tu awèŋ sè wèŋ sə naan bohòJisòos guŋ lo mantombi. ³ Ya kà də mok mʉtsətsə'rə wèŋ foho lo mankwèŋ bũu nsàap ngə' sè wo sə fa weŋ yà'a dük. Wèŋ rì yàwèŋ sè' də bo Nwi cu ca sè', də wo fa ves nsàp ngə' ènə. ⁴ Ghà nè vesùwèŋ ànə cum ntòbəbɛ' yà'a, vès ànə tsok weŋ ŋga mvək nə à ka ntòdzen, də wo nə yeŋsə vesùwèŋ ngə'. Fana wèŋ rì tse' sè' də yà'a nə ye megu sè' mʉmvə' ànə. ⁵ Nà'a njo nè mù a tum Timati nə. Mù a ko fùk ntum bùè fana mù tum yi də yi kə kük ja'a-na də wèŋ sə fa mali ntum awèŋ bohòJisòos àlɛ. Mù a sə mərə də kè ŋgà mùmsè

bwìŋ nə a gù wəŋ, wèŋ gbɛ foho lo maŋkwèŋ, ya fàha sè vès à gù sə bisə wà àlè'.

⁶ Timatì nə a bwì foho vè laŋ. Yi tsə' fa ves mvəsə dzədzəm àwèŋ cu. Yi də ntɔm awèŋ tə mali mègù bohòNwì, nə də wèŋ sə dzəm mali mòk bə mòk. Yi tsə' fa fe'lə ves mok sè' duk də wèŋ tsərəgè ves vɛ'ɛ bəboŋ nùumbu pwe'. Malə a ko wəŋ mvəsə malə a ko ves bohòwèŋ sè'. ⁷ Nə yeè nə də bwema avès-a, bə jamə nə ye ŋgə' nè vès sə yə nə pwe'fo' fana ntum avès kwa mvəsə vès à yuk də wèŋ sə lo mali mantombi. ⁸ Nə ŋga'a nè'e yònsə kwèhè nə ves. Ntum avès nə sə boŋ vɛ'nə ŋga wèŋ təŋ mali-a gugun bə dzədzəm àwèŋ, wəŋ Tà wèŋ mvwe' mò'fis na. ⁹ Nə ŋga'a nè'e aco vès kwasə liŋ Nwì àvès bùu tu awèŋ. Vès tse' ŋgòkwasə yi bùu nsàp kwəkwa nè vès tse' nà' mantombi yi bùu wèŋ. ¹⁰ Vès fekgə Nwì nùm bə ndzəm bə ntum avès pwe' də co yi gu ya vès ye fe'lə si awèŋ sèmok. Vès ye wəŋ ya vès tɛsə wəŋ bə yusə wèŋ sə jamə mali yà' bə dzədzəm àwèŋ nè bə liŋ Jisòs nə.

¹¹ Nwì àvès nè yi tè', nə ye Tà Jisòs fuhɛ nonjsə mandzə co vès kə ye wəŋ sèmok. ¹² Nwì gu co dzədzəm nè wèŋ tse' nà' mɔtsətsə'rèə wèŋ, nə ye bohòbwìŋ pwe' nà'a kuk lo mantombi. Nà'a kuk, nə yam dzeŋ co mvəsə vès dzəm wəŋ yà'a. ¹³ Bə nsàp dzədzəm ènə fana yi nə guŋsə wəŋ, wèŋ ye kəkərè bə rərəŋ sè' mantombi Nwì àvès nè yi Tè', nùumbu nè Tà Jisòs nè vè bə bùu ye sè rərəŋ sə.

Ncu Nè Co Nà' Gũ Nwì Yi Kwa

¹ Ngòlèsə lòbə zəŋ fana bwema avès, wèŋ a yə'rə jə nsàp ncu nè wèŋ tse' ŋgòcu ya Nwii nə kwa bohòwèŋ nə bohòvès laŋ. Wèŋ ànə sə cum lok to mantombi sè' vɛ'nə. Nè ŋga'a nè'e fana vès sə ləŋ wəŋ nsàp nè gũgũŋ bə liŋ Tà Jisòs də wèeŋ ghaha wesə ghaha. ² Wèŋ rì tse' ntip sè vès à fa wəŋ bə ŋaəŋ Tà Jisòs yà'a laŋ. ³ Yusè Nwì dzəm bohòwèeŋ duk də wèeŋ ye rərəŋ, nə kà bo sənə nzak sàhà tse' lok. ⁴ Ndàaŋwè pwe' riŋ nsàp mandzè nè co bə ŋgwe yee cum. Wo cum bə nsàp mandzè nè nà'a ye bəboŋ bohòNwì, nə kà ywì'lə nzòŋ jə vè. ⁵ Nà'a kà ncu nè nà' mègù bùu njè bəba kè mbəmbam ye. Bùu pegè sè wo ka Nwì riŋ cugè yàwo vɛ'nə. ⁶ Bə nzak ŋwàŋwè bə ŋwəmbam ènə fana, ka bəboŋ co ŋwèe lim zə mòk yeŋ. Vès ànə tsok fa wəŋ yè'sə mantombi laŋ. Nè ŋga'a nè'e vès sə sè mali wəŋ ntu' gũgũŋ də Tà Nwii nə kà nsàp ŋwè nè yi gũ vɛ'nə mè'rè. ⁷ Nwì ànə to vesùwèŋ, ka də a sə kə koho sàhà yeŋ. Yi à to vesùwèŋ ŋgòcu ncu nè rərəŋ co bùu ye. ⁸ Ye də a ye-a ŋga ŋwè nəmòk dzèeŋ-a yusè vès yə'rə fa wəŋ yè'sə, yi sə kà ŋwè dzèeŋ. Yi dzèeŋ Nwì nè yi fagè ves Yòŋsə ye nè Rərəŋ nə. ⁹ Kaco vès com fa yiskok wəŋ mvè'nè wèŋ tse' ŋgòdzəm bwema sè wo a dzəm Jisòs còmə yeŋ. Vès duk vɛ'nə bùusè Nwì a yə'rə fa wəŋ bə tu awèŋ mvè'nè wèŋ tse' ŋgò dzəm mòk bə mòk sə laŋ. ¹⁰ Wèŋ a nitsè' fa bwema sè mvwe' nzeŋgòŋ Màsìdoniyà pwe' nsàp dzədzəm ànə. Fana bwema avès, vès sə ləŋ də wèeŋ gũŋ casə vɛ'nə càsə. ¹¹ Wèeŋ kiŋ sə vèə wèŋ də wèeŋ cum

ncu nè nà'a gøe'. Kà dæ wèeŋ sæ gesø ke'cà cùu awèŋ bə nzak bwìŋ ŋga wo ka weŋ to duk. Fàk bum sè wèŋ dzəm yà' bə bo awèŋ. Vès ànə tsok weŋ yè'sə mantombi fa' laŋ. ¹² Wèeŋ gũ-a vè'nə fana wèeŋ nè gũ bùu sè wo ka Jisòs riŋ ŋgòjə weŋ co bwìŋ. Yà' ye sè' dæ yusè wèŋ dzəm yà' fana wèŋ kà lis bohòŋwè nəmòk kàk yiskok.

Mvək Nè Tà Jisòs Nè Bwìŋ Vèə

¹³ Bwema avès a, vès dzəm dæ wèeŋ riŋtse' zìnə nè nà' cu bə bòp bù nè wo a kpũ lòyàwo laŋ. Wèeŋ riŋtse' ya wèeŋ cu, ntəm kà weŋ bə zeŋ sə rwi'. Wèeŋ kà-a yà' rì fana, ntəm sə rwi' weŋ co bùu sè wo ka naàŋ tu dæ Jisòs Kræest nè kè lòkoksə yà'wèŋ ntsə'mòk tse'. ¹⁴ Vès dzəm sə ntũu vès duk dæ Jisòs à kpũ fana Nwì lòkoksə yi mvwe' kpũ. Ye dæ vès sə dzəm sè' duk dæ Nwii nè jəŋ fəsə və fe'lə bùu sè wo ànə kpũ bə Jisòs wèŋ bəbɛ'. Vès sə duk bùu sè wo ànə kpũ ŋga wo dzəm bohòyi. ¹⁵ Yusè vès sə dæ vès yə'rə fa weŋ ŋga'a yè'e, a yəyərè nè Tà Jisòs. Numbu nè Tàa bwi foho vèə fana vesùwèŋ sè a cu ŋwəm, a nè kà mantombi nè me'rə bùu sè wo à kpũ laŋ maŋkwèŋ ntòlòto. ¹⁶ Numbu ànə ye, wo nè ke' daksə ŋgù nè nà' tse' ŋàŋ. Ŋgì masinjà Nwì nè tu nè, nè cep, anə yuk ŋgì ntà Nwì ŋga wo fæp nà'. Tàa nè tesə tsoŋ mubu bə tu ye. Bùu sè wo à dzəm Jisòs, nè kpũ lo mee nè lokok mvwe' kpũ ŋkuŋ, ¹⁷ fana Nwì kurə be'lə vesùwèŋ sè a cu malì ŋga'a ŋwəm mvək ànə sə mvwe' mò'fis, a kə tseŋ Tà mɛ mba'a. Yà'a mok mvək nè vesùwèŋ nè cu maligè mok ves

Tà wèŋ m̀wwe' mò'fis. ¹⁸ Nə yeè nə də bə ncèp ènə, wèeŋ jəŋ nà', nə fupsə ntəm awèŋ bə zeŋ.

5

Fuhə, Busè Tà Jisòos Nə Bwi Foho Və

¹ Bwema am wèŋ, njo nə də m̀ com yis fa wen ɲgòrɪŋtse' ghà nè bum yè'sə nè kè ye nə bùè.
² Busè wèŋ bə tu awèŋ, wèŋ rɪŋtse' vɛ'ɛ pap də nùmbu nè Tà nə nè kè vèə co ɲgà yè vè nòon ndzəmè, wù kà rì. ³ Ghà nè bwɪŋ sə duk də, <<Bum pwe' m̀gù mok bèbɔŋ də ɲgə'ə bùè>> fana, wo ye megu ɲga ɲgə' nèbɔp vè vɛ'ɛ vak. Yà'a nə və co m̀vəsè dzəmwee kogè ɲwàŋwè yè'e. Yà'a vè vɛ'nə, fana wo kà swirè. ⁴ Fana bohòma nè njàwèŋ, wèŋ ka sənə ndzəm cum, bwema am wèŋ na. Fana ntsə' nə nè kà wen co ɲgà yè vè yi ɲga wèŋ ka rɪŋ kè tsèŋ. ⁵ Wèeŋ bɔp bù nè bohòmareŋ, wèeŋ bù sè wèeŋ gùgè bum ɲga a marəŋ bə nùm. Vesùwèŋ ka bɔp bù ɲgàa ndzəm yeŋ. A kà bum m̀wwe' səswihi gùgè. ⁶ Nə yeè nə də bum yè'sə zìnə vɛ'nə fana, vesùwèeŋ kà də a sə dzəmlo co m̀vè'nè bù mok dzəmgè yà'a duk. Vesùwèeŋ sə kək kù'ɛ, nə sə ko ni' avès. ⁷ M̀vək nè bwɪŋ dzəmgè lo, mok jəhə rùk wèŋ pwe', a nè ndzəmè. ⁸ Nə ye də vesùwèeŋ yàvès bɔp bù ɲgàa marəŋ. Vesùwèŋ tse' ɲgòko yàvès ni'. A tse' ɲgòtəhə lok ni' avès bə dzədzəm nə ye naan̄tu bohòNwì co ɲkè ɲga bɔp kà ves jwèŋ. A sə kək gesə lis àvès bə lù nè Nwii nè kè fa ves. Yà'sə nə ye co tàm mòk nè a ta tse' nà' co yu səmok sè bɔp kà ves tu jwèŋ. ⁹ Ka də Nwì ànə cokfis vesùwèŋ də ya yi fa ves ɲgə' yeŋ.

Yi à cokfis ves ya a tse' lù nè yi fa ves nà' ndzò bohòTà Jisòs Krèst. ¹⁰ Yi Jisòs nè yi à kpɔ̀ bùu vès, dɛ̀ ya a cum vesiwèŋ bə̀bɛ̀'. Dɛ̀ ya ŋga a cu-a sè ŋwəm bə̀ ŋga a kpɔ̀, yà' lok gu yə̀yərè, ghà nè yi vèə, anè cu vesiwèŋ. ¹¹ Nə̀ yeè nə̀ vɛ̀'nə̀ fana bòdə̀ wèŋ sə̀ tɛ̀sə̀ mòk bə̀ mòk, nə̀ gu wo lo mantombi mvəsè wèŋ sə̀ gù ŋga'a yè'e.

Ncèp Nè Nà' Lèsə̀ Lòo

¹² Bwema avès, vès sə̀ lɛ̀ŋ wɛ̀ŋ də̀ wèŋ jə̀ŋ bùu sè wo fàkgè bohòwèŋ yà'a co bùu sè bwìŋ nè zìnə̀. Wo sè wo kùkgè wɛ̀ŋ, nə̀ sə̀ yərè wɛ̀ŋ co bùu sè Tà Jisos yà'a. ¹³ Wə̀p wo, nə̀ dzəm wo càsə̀ yà pwe'. Gù wo vɛ̀'nə̀ bùu nsàp fàk nè wo sə̀ gùu. Wèŋ cum cù mò'fis, nə̀ kà sə̀ kùəm. ¹⁴ Vès sə̀ lɛ̀ŋ wɛ̀ŋ bwema avès-a, də̀ wèŋ tip ŋgàa wɛ̀ wèŋ. Wèŋ kwɛ̀'sə̀ bùu sè wo tse' wɛ̀, nə̀ tɛ̀sə̀ sè wo jì ñàŋ. Wèŋ sə̀ ko ntum awèŋ bohòbwìŋ lòŋ. ¹⁵ Kà də̀ wèŋ fa mandzè də̀ ŋwèe gu fəsə̀ fa ŋwè bup bə̀ bup duk. Yusə̀ ye də̀, ghà yà pwe' nè wèŋ cu, wèŋ tse' ntum nè ŋgògù bə̀bɛ̀ŋ bohòmòk bə̀ mòk. Wèŋ gu bohòbwìŋ lòŋ sè' vɛ̀'nə̀.

¹⁶ Wèŋ sə̀ kwa ghà yà lòŋ. ¹⁷ Wèŋ sə̀ gu pìriyà ghà nè fòlòŋ, nə̀ kà wò. ¹⁸ Ŋga sə̀ bup-a sè yà pwe', wèŋ sə̀ kwasə̀ Nwì. Yà'a yusè Nwì dzəm də̀ yà'a ye vɛ̀'nə̀ bə̀ ncu àwèŋ co bùu Jisòs Krèst. ¹⁹ Wèŋ kà də̀ wèŋ limsə̀ Yòŋsə̀ nè Rərəŋ nə̀ ŋga yi kà fàha ye gù duk. ²⁰ Kà də̀ wèŋ bɛ̀ŋ ncèep sè bùu sè wo sə̀ tsòho bum sè Nwì a nìŋtsə̀' fa wo duk. ²¹ Mùmsə̀ ja'a yà' pwe'fo', nə̀ bɛ̀' tse' sè wèŋ yə̀ də̀ yà'a bə̀bɛ̀ŋ. ²² Wèŋ kà bo sənə̀ bup nè mò'fis gèsè lok. ²³ Nwì bə̀ tu ye, nè

yi fagè vesùwèṅ fifi, yi nonṣə ncu àwèṅ kèkurè bə mandzè nè fòpwe'fo'. Yumok kà bohòwèṅ bup lok. Yi nonṣə yà' nsàp nè Jisòs Krest nè yi Tà àvès nè kè bwì vèə, wèṅ ye jìnjo. ²⁴ Yi Nwì nè yi a to wèṅ, yi nè gu yà', bùusè yi ṅwè nè zìnə.

²⁵ Bwema avès, wèṅ sə ləṅ fa ves pìriyà yàvès sè'. ²⁶ Cəpsə fa mu bùu sè wo à dzəm Jisòs sə pwe' bə cècèpsè nè bəboṅ co bwema. ²⁷ Mù cèp bohòwèṅ bə ṅàaṅ sè bohòTà də wèṅ taṅ fa ṅwàk ènə bohòbùu sè wo à dzəm Jisòs pwe'fo'.

²⁸ Bəbo nè Tà àvès Jisòs Krest nà'a ye bohòwèṅ.

Nwàk Nwì Ma Rùk Nè Fi
New Testament in Yamba

copyright © 2011 Wycliffe Bible Translators, Inc.

Language: (Yamba)

Contributor: Wycliffe Bible Translators, Inc.

All rights reserved.

2020-12-01

PDF generated using Haiola and XeLaTeX on 22 Feb 2024 from source
files dated 29 Jan 2022

c475d5b3-da44-51cf-93ca-f255b72fe481